

CENTRALNA BANKA  
BOSNE I HERCEGOVINE



ЦЕНТРАЛНА БАНКА  
БОСНЕ И ХЕРЦЕГОВИНЕ

# INFO CBBiH



## U ovom broju:

CBBiH OBILJEŽILA SVJETSKI DAN  
ŠTEDNJE

DEPOZITI GRAĐANA 11,83  
MILIJARDI KM

CBBiH DOGRADILA JEDINSTVENI  
REGISTAR RAČUNA POSLOVNIH  
SUBJEKATA U BiH



UBBiH I CBBiH ORGANIZOVALI  
STRUČNI SKUP ZA MEDIJE

GUVERNER CBBiH NA GODIŠNJOJ  
SKUPŠTINI MMF-A I SVJETSKE  
BANKE

SLUŽBENICI CBBiH UČESTVOVALI  
U B2B UTRCI



AKCIJA DARIVANJA KRVI



Izdavač: Centralna banka Bosne i Hercegovine;  
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i  
Služba za protokol i prevodenje

Web stranica: <http://www.cbbh.ba>  
E-mail: [pr@cbbh.ba](mailto:pr@cbbh.ba)  
kontakt telefon: (033) 278 123

## CBBiH OBILJEŽILA SVJETSKI DAN ŠTEDNJE

Centralna banka Bosne i Hercegovine (CBBiH) je i ove godine, već tradicionalno, obilježila Svjetski dan štednje 31. 10. 2018. godine, s tim što je obilježavanje trajalo tri dana od 30. 10 do 1. 11. 2018. godine.

Objekte CBBiH u Sarajevu 31. 10. 2018. posjetilo je više od 60 učenika iz dvije osnovne škole, Osnovna škola „Grbavica I“ iz Sarajeva i Osnovna škola „Sveti Sava“ iz Istočnog Sarajeva, skupa sa svojim učiteljicama.

Učenike osnovnih škola dočekali su službenici Odjeljenja za ljudske resurse i Odjeljenja trezora, koji su u auli Centralnog ureda CBBiH djeci pokazali specimene novčanica iz starih vremena i objašnjavali način štampanja i zaštite novčanica konvertibilne marke.

Nakon kratke posjete postavci novca, učenici su posjetili novu zgradu Centralnog ureda CBBiH gdje su u amfiteatru bili učesnici radionice kojom je na inovativan, i djeci prilagođen način, prikazan nastanak novca te svrha i važnost štednje.

Nakon posjeta učenika osnovnih škola, u posjetu CBBiH u Sarajevu stiglo je i više od 90 učenika srednjih škola, Mješovite srednje škole iz Maglaja i Mješovite srednje škole „Doboj-Istok“ iz Velike Brijesnice, sa profesorima. U amfiteatru Centralnog ureda CBBiH, prigodnu prezentaciju održala je viceguvernerka CBBiH Želimira Raspudić.

Svjetski dan štednje obilježen je i u Glavnoj jedinici Mostar CBBiH koju su posjetili učenici trećeg razreda mostarske Osnovne škole „Antun Branko Šimić“ i učenici Gimnazije Mostar. Povodom Svjetskog dana štednje, u objektu Glavne banke Republike Srpske CBBiH u Banjoj Luci organizovana je posjeta učenika Osnovne škole „Ivo Andrić“ i učenika Srednje ekonomske škole. Obilježavajući ovaj dan, u Palama su, u objektima Osnovne škole Pale i Srednjoškolskog centra Pale, organizovane prigodne aktivnosti, dok su u Brčkom organizovane posjete učenika Prve i Druge osnovne škole i učenika Srednje ekonomske škole objektima CBBiH Filijale Brčko.

Učenicima su upriličene prigodne prezentacije, prilagođene uzrastu, o upravljanju novcem i značaju štednje, s ciljem da se kod djece od najranijih dana stvori svijest i razvoj ovih korisnih navika. Osim toga, bila je to prilika da se učenici upoznaju o radu CBBiH i njenim funkcijama. Svjetski dan štednje bio je prilika da se učenicima podijele prigodne publikacije, brošura za djecu „Novko i Novčica u svijetu novca“ te letak za srednjoškolce pod nazivom „Šta je štednja?“.

Ovi događaji organizovani povodom Svjetskog dana štednje, sastavni su dio finansijske edukacije koju CBBiH posljednjih godina provodi s ciljem jačanja finansijske inkluzije na način odgovornog upravljanja finansijama za dobrobit ekonomskog razvoja i rasta Bosne i Hercegovine. Tako je do sada CBBiH otvorila vrata učenicima osnovnih i srednjih škola te studentima iz cijele BiH i univerziteta izvan BiH (SAD, Austrija).

Navedene aktivnosti su realizovane u okviru projekta Promocija finansijske edukacije i inkluzije koju provodi CBBiH uz podršku Evropskog fonda za jugoistočnu Evropu Development Facility (EFSE DF).



## DEPOZITI GRAĐANA 11,83 MILIJARDI KM

Prema podacima Centralne banke Bosne i Hercegovine (CBBiH), na kraju septembra 2018. godine ukupni depoziti stanovništva kod komercijalnih banaka u BiH iznosili su 11,83 milijardi KM, što je najveći zabilježeni nivo. Depoziti stanovništva imaju daleko najveće učešće u ukupnim depozitima kod komercijalnih banaka, od 55,4%, pa stoga predstavljaju važnu osnovu finansiranja i funkcionisanja banaka.

Ako posmatramo depozite stanovništva po ročnoj strukturi, oročeni i štedni depoziti u septembru 2018. iznose 5,45 milijardi KM ili 46,1% ukupnih depozita stanovništva, od toga



kratkoročni depoziti čine 500 miliona KM, a dugoročni 4,95 milijardi KM. Transakcijski računi i depoziti po viđenju čine 6,38 milijardi KM ili 53,9% ukupnih depozita stanovništva.

U pogledu valutne strukture, depoziti stanovništva u domaćoj valuti iznose 5,54 milijardi KM što čini 46,8% učešća, što je značajno više nego prije pet godina kada je udio depozita u domaćoj valuti bio 38%. Depoziti u eurima iznose 5,70 milijardi KM ili 48,2%, a depoziti u ostalim stranim valutama 591 milion KM ili 5%.

Stanovništvo u BiH kontinuirano povećava depozite, pa su tako u poređenju sa stanjem na kraju septembra prošle godine porasli za čak 808,9 miliona KM ili 7,8%. Međutim, postoje značajne razlike u tempu rasta zavisno od tipa depozita. Najbrže rastu transakcijski depoziti, koji su porasli za 18,0% (odnosno 489 miliona KM), zatim depoziti po viđenju koji bilježe porast od 14,4% (odnosno 311 miliona KM). Oročeni i štedni depoziti, a koji odražavaju štednju, neznatno rastu i na godišnjem nivou su imali porast od 0,3% (18 miliona KM).

Na usporeni rast oročenih i štednih depozita stanovništva utiče i kontinuiran pad kamatnih stopa tokom posljednjih godina. Kamatne stope na oročene depozite stanovništva

u euro valuti bilježe kontinuiran pad tokom posljednjih pet godina, sa manjim oscilacijama. Tako su za oročene depozite stanovništva u eurima sa dogovorenim dospijanjem od 1 godine do 2 godine smanjene sa 3,279%, koliko je bila prosječna stopa za 2013. godinu, do 1,188% u prvih devet mjeseci 2018. godine. Istovremeno su za oročene depozite sa dogovorenim dospijanjem preko 2 godine bile na nešto višem nivou, ali sa istim trendom smanjivanja od 3,945% u 2013. godini do 1,462% u prvih devet mjeseci 2018. godine. Za isti posmatrani period, kamatne stope na oročene i štedne depozite stanovništva u KM sa dogovorenim dospijanjem od 1 godine do 2 godine su se smanjivale od 3,262% na 1,276%, a za oročenje preko 2 godine u rasponu od 3,661% do 1,371%.

Stabilan domaći bankarski sektor, uz pouzdan sistem za osiguranje depozita, pruža garanciju stanovništvu da svoja finansijska sredstva drži na računima u bankama, a putem kojih obavljaju tekuće transakcije ili štede za kasnije periode. Na osnovu tog povjerenja i povjerenih sredstava stanovništva, banke su u mogućnosti da finansiraju i doprinose efikasnijem funkcionisanju i rastu ekonomije, te da pomognu u reduciranju neformalnih transakcija.

## ŠTEDNJA - OSNOVA ZA RAST I RAZVOJ

Svjetskim danom štednje obilježava se sjećanje na Prvi međunarodni kongres štedioničara, održan 31. oktobra 1924. godine u Milanu, na kojem su predstavnici svjetskih štednih ustanova, njih 350 iz 27 država svijeta, tražili izlaz iz krize koju je prouzrokovao Prvi svjetski rat. Na kongresu su zaključili da štednja predstavlja osnovu za rast i razvoj, te se ovaj dan posvećuje propagiranju i jačanju svijesti javnosti o važnosti štednje za savremenu ekonomiju i lične potrebe svakog pojedinca.

Važnost štednje je uvijek bila jako velika, pa je tako i u današnje vrijeme iz razloga što štedišama omogućava stvaranje rezerve za buduću potrošnju te pomoć za eventualne finansijske teškoće. Štednja, istovremeno, stvara predušlove finansijskim institucijama za kreditiranje realnog sektora ekonomije.

Novčani depoziti su sredstva komitenata, najčešće stanovništva, a na koje komitent zarađuje kamatu koja je definisana kamatnom stopom. Građani BiH u komercijalnim bankama drže depozite, u konvertibilnim markama ili stranoj valuti, kao kratkoročno ili dugoročno oročene, kao depozite po viđenju, te u vidu transakcijskih računa. Depoziti stanovništva u BiH kontinuirano rastu. Uprkos, trenutno, niskim kamatama na depozite, građani nastavljaju s držanjem depozita u domaćim bankama, što je pokazatelj uspostavljenog i održanog povjerenja u bankarski sektor i u sistem osiguranja depozita. Trenutno program osiguranja depozita, koji provodi Agencija za osiguranje depozita Bosne i Hercegovine, pokriva sve depozite do iznosa od 50.000,00 KM.

Povodom Svjetskog dana štednje, a u sklopu programa finansijske edukacije koju već nekoliko godina provodi, Centralna banka Bosne i Hercegovine (CBBiH) svake godine organizuje više prigodnih aktivnosti. Ove aktivnosti su prethodnih godina uglavnom organizovane u Centralnom uredu CBBiH u Sarajevu, međutim od ove godine organizuju se po svim glavnim jedinicama i filijalama, a po potrebi i u školama.

Radi se o posjetama učenika osnovnih i srednjih škola, tokom kojih se učenicima upriliče prigodne prezentacije, prilagođene uzrastu. Prezentacije su o temi upravljanja novcem i važnosti štednje, s ciljem stvaranja svijesti i razvoja ovih korisnih navika kod djece. Osim toga, tokom posjeta učenici budu u prilici od službenika CBBiH dobiti sve važne informacije o glavnoj monetarnoj instituciji u BiH i njenim funkcijama.

Navedene aktivnosti se realizuju u sklopu projekta Promocija finansijske edukacije i inkluzije koje provodi CBBiH uz podršku Evropskog fonda za jugoistočnu Evropu – Development Facility (EFSE DF).

## CBBiH DOGRADILA JEDINSTVENI REGISTAR RAČUNA POSLOVNIH SUBJEKATA U BOSNI I HERCEGOVINI



U cilju unapređenja platnih sistema, Centralna banka Bosne i Hercegovine (CBBiH) izvršila je dogradnju Jedinstvenog registra računa poslovnih subjekata u Bosni i Hercegovini na novu platformu i s novim funkcionalnostima, a koji je počeo s radom od 1. 10. 2018. godine.

Radi se o registru svih računa poslovnih subjekata koji platni promet u Bosni i Hercegovini obavljaju preko računa otvorenih u bankama i CBBiH. Novost je da se sada u registru nalaze svi računi poslovnih subjekata, dok je do sada sadržavao samo transakcijske račune.

Jedinstveni registar računa poslovnih subjekata u Bosni i Hercegovini prvenstveno će koristiti komercijalnim bankama, poreznim organima, organima uprave, organima za provođenje zakona te ostalim nivoima vlasti prilikom otkrivanja finansijskih struktura i transakcija koje kompanije i pojedinci mogu iskoristiti na nezakonit način, npr. za

izbjegavanje plaćanja poreza i pranje novca. Registar će, takođe, pružati informacije svim pravnim i fizičkim licima koja naplatu svojih potraživanja moraju tražiti prinudnim putem preko ovlaštenih institucija.

Jedinstveni registar računa poslovnih subjekata u Bosni i Hercegovini vodiće CBBiH, dok za tačnost i pravovremenost dostavljenih podataka odgovaraju isključivo komercijalne banke.

Podaci iz Jedinstvenog registra računa poslovnih subjekata u Bosni i Hercegovini biće dostupni za ovlaštene korisnike direktno putem interneta te za sve ostale korisnike u formi pojedinačnih izvještaja. Novina je da, pored CBBiH i entitetskih agencija za bankarstvo, besplatan pristup putem interneta mogu ostvariti i institucije, organi uprave, jedinice lokalne samouprave i komercijalne banke. Ova novina navedenim subjektima omogućava da putem interneta imaju stalni pristup potrebnim podacima, a što osigurava efikasnije korištenje u odnosu na pisane zahtjeve.

CBBiH distribuciju podataka iz Jedinstvenog registra računa poslovnih subjekata u Bosni i Hercegovini u formi pojedinačnih izvještaja i dalje vrši preko organizacijskih jedinica (glavne jedinice i filijale), a na osnovu pisanog zahtjeva. Korisnici će izvještaje moći preuzimati lično, putem telefaksa ili putem e-maila. Novost kod distribucije ove vrste izvještaja je da ih je sada, pored glavnih jedinica, moguće preuzeti i u filijalama CBBiH u Brčkom i na Palama.

Sve relevantne podatke i informacije o Jedinstvenom registru računa poslovnih subjekata u Bosni i Hercegovini zainteresovani mogu pronaći na web stranici CBBiH – [www.cbbh.ba](http://www.cbbh.ba) u dijelu koji se odnosi na platne sisteme.

## UBBiH I CBBiH ORGANIZOVALI STRUČNI SKUP ZA MEDIJE

U organizaciji Udruženja banaka Bosne i Hercegovine (UBBiH) i Centralne banke Bosne i Hercegovine (CBBiH), u prostorijama CBBiH u Sarajevu je 25. 10. 2018. godine održan stručni skup za medije s ciljem razmjene mišljenja i produblivanja razumijevanja u vezi sa zakonom iz oblasti bankarske industrije i njihovog direktnog uticaja na rad banaka i klijente.

Unapređenje finansijske pismenosti korisnika bankarskih usluga zajednički je cilj banaka i medija, zaključeno je, između ostalog, na ovom skupu čiji je naziv bio „Legislativa u bankarskoj industriji i direktan uticaj na klijente“.

Stručni skupovi poput ovog su odlična prilika za jačanje saradnje s medijima u cilju približavanja uloge bankarskog sektora u razvoju društvene zajednice, educiranju građana o korištenju bankarskih proizvoda te uskoj povezanosti razvoja privrede i finansijskog sektora, rekao je predsjednik Upravnog odbora UBBiH Dalibor Čubela.

„Svi smo ujedinjeni u naporima da stvorimo bolje uslove života u Bosni i Hercegovini“, kazao je Čubela.

„U svijetu centralnih banaka, finansijska edukacija i finansijska inkluzija polako postaju dio obaveznog mandata, jer se smatra da



podizanje nivoa svijesti svakog pojedinca indirektno doprinosi finansijskoj stabilnosti u zemlji. Finansijski edukovan klijent je osoba koja poznaje svoje limite i, kao takav, jednako je važan za finansijsku stabilnost kao i sve makroprudencijalne mjere koje se provode na institucionalnom nivou. Centralna banka Bosne i Hercegovine je u posljednjih nekoliko godina pokrenula, samostalno i u saradnji sa partnerskim organizacijama, niz aktivnosti na podizanju finansijske pismenosti stanovništva, od kojih izdvajamo više seminara, edukativnih posjeta instituciji, radionica za mlade i publikacija“, naglasio je guverner CBBiH dr. Senad Softić.

„Jedan od osnovnih ciljeva novog regulatornog okvira bankarskog sektora Evropske unije je da uspostavi jaču otpornost banaka na finansijske šokove i njihovu transparentnost, s posebnim fokusom prema krajnjim korisnicima njihovih usluga. Imajući u vidu navedeno, smatram da je ovo veoma važan stručni skup koji ima za cilj bolje razumijevanje načina na koji funkcionišu banke, te da apsolutno doprinosi korisnicima finansijskih usluga i novinarima da bolje anticipiraju promjene i da se adekvatnije kritički osvrnu na određene procese u bankarskom sektoru“, izjavio je dugogodišnji bankarski risk menadžer mr. Amir Softić.

“Edukacija o poslovanju banaka, načinu njihovog rada i izvještavanja o njihovom radu je od izuzetne važnosti za sve one koje zanima poslovanje banaka, koji čitaju njihove izvještaje,

prenose informacije o njima ili tumače njihovo poslovanje. Banke su veoma specifične finansijske institucije za čije razumijevanje je potreban visok stepen znanja o njihovom mjestu i ulozi u jednoj ekonomiji, kao i osnovnim specifičnostima u njihovom poslovanju“, istakao je prof. dr. Velid Efendić, profesor Ekonomskog fakulteta u Sarajevu.

UBBiH i CBBiH žele odgovoriti na potrebu edukacije o bankarskom poslovanju, što će doprinijeti kvalitetnijem protoku informacija između banaka i korisnika njihovih usluga. Organizatori očekuju da će ovakvi oblici edukacija doprinijeti kvalitetnijem razumijevanju mjesta i uloge banaka u bh. ekonomiji te kreiranju korektnije slike o bankarskom sistemu u cjelini.



## GUVERNER SOFTIĆ NA 40. SASTANKU KLUBA GUVERNERA REGIJE CENTRALNE AZIJE, CRNOG MORA I BALKANA

Guverner Centralne banke Bosne i Hercegovine (CBBiH) dr. Senad Softić učestvovao je u radu 40. sastanka Kluba guvernera regije Centralne Azije, Crnog mora i Balkana koji je od 19. do 21. 9. 2018. godine, održan u Bukureštu, glavnom gradu Rumunije.

Centralna tema ovog sastanka guvernera, među kojima su bili i predstavnici velikih centralnih banaka poput Rusije i Kine, bila je monetarna politika i finansijska stabilnost. Osim toga, raspravljano je i o brzom plaćanju u kontekstu opsežnijih platnih sistema.

Diskusija se vodila u tri panela, pod nazivima „Kako formulirati monetarnu politiku i održati finansijsku stabilnost u kontekstu jačanja USD? Kako odgovoriti na odliv kapitala?“, „Finansijska stabilnost i perspektive rasta korporativnog

duga u ekonomijama u razvoju“ te „Brza plaćanja u kontekstu opsežnijih platnih sistema. Prednosti i rizici. Trebaju li biti promovisana od strane finansijskih regulatora?“

U okviru prvog panela prezentiran je izvještaj radne grupe, koja između dva sastanka kluba guvernera obrađuje teme od interesa za sve centralne banke. Guverner CBBiH se u okviru ovog panela osvrnuo na perspektivu rasta korporativnog duga u narastajućim ekonomijama i ekonomijama u razvoju.

Klub guvernera regije Centralne Azije, Crnog mora i Balkana dva puta godišnje okuplja guvernera i druge visoke zvaničnike iz svijeta monetarne politike i finansija kako bi razmijenili mišljenja o aktuelnim temama i daljem unapređenju međusobne saradnje.



## NOVI ŠEF MISIJE MMF-A U BIH MARTIN PETRI U NASTUPNOJ POSJETI CBBiH



Guverner Centralne banke Bosne i Hercegovine (CBBiH) dr. Senad Softić primio je 17. 9. 2018. godine, u nastupnu posjetu novog šefa misije Međunarodnog monetarnog fonda (MMF) za Bosnu i Hercegovinu Martina Petrija, koji će na ovoj poziciji zamijeniti dosadašnjeg šefa misije Nadeema Ilahija.

Teme sastanka s gđinom Petrijem su, između ostalog, bile status provedbe programa MMF-a s Bosnom i Hercegovinom, program predstojeće međunarodne konferencije o budućnosti gotovine koju CBBiH organizuje 15. 11. 2018. godine, na kojoj će uvodno izlaganje održati visoki zvaničnik MMF-a, kao i tehnička saradnja MMF-a i CBBiH.

Pored novog šefa misije za Bosnu i Hercegovinu, sastanku je također prisustvovao i dosadašnji šef misije MMF-a u Bosni i Hercegovini Nadeem Ilahi, koji odlazi na novu dužnost, zatim rezidentni predstavnik MMF-a u Bosni i Hercegovine Francisco Parodi te drugi zvaničnici iz MMF-a i CBBiH.

## GUVERNER CBBiH NA GODIŠNJOJ SKUPŠTINI MMF-A I SVJETSKE BANKE

Guverner Centralne banke Bosne i Hercegovine (CBBiH) dr. Senad Softić u periodu od 12. do 14. 10. 2018. godine prisustvovao je Godišnjoj skupštini Međunarodnog monetarnog fonda (MMF) i Svjetske banke (SB), koja je ove godine održana u Nusa Dui, Indonezija. U svojstvu guvernera, u Svjetskoj banci za vrijeme trajanja Godišnje skupštine, a po ovlaštenju predsjedavajućeg Vijeća ministara Bosne i Hercegovine dr. Denisa Zvizdića, guverner Softić prisustvovao je većem broju sastanaka sa zvaničnicima MMF-a, SB i drugih međunarodnih finansijskih institucija.

Od niza sastanaka, treba izdvojiti plenarnu sjednicu Godišnje skupštine MMF-a i SB koja je bila fokusirana na potrebu unapređenja saradnje na globalnom nivou i uspostave novog oblika multilateralizma u cilju efikasnije borbe s globalnim problemima, poput siromaštva, globalnog zagrijavanja i drugih problema s kojima se nijedna zemlja sama za sebe efikasno ne može boriti. Ključna poruka je ta da je došlo krajnje vrijeme da se zaustavi rivalstvo i konkurencija i da se pažnja usmjeri na ulaganje u ljudske resurse, obrazovanje, sticanje vještina te jačanje sistema zdravstvene i socijalne zaštite.

Pored plenarne sjednice, guverner Softić prisustvovao je i redovnom sastanku holandsko-belgijske Konstitucije MMF-a i SB kojoj pripada i Bosna i Hercegovina, a na kojoj su obrađene teme iznesene na plenarnom zasjedanju s osvrtom na regionalne specifičnosti. Ovi sastanci su također bili i prilika da se razgovara o temama o kojima Konstitucija treba imati formiran stav na sastancima MMF-a i SB.



Tokom svog boravka u Indoneziji, guverner Softić je održao sastanke s direktorom Odjela MMF-a za Evropu Paulom Thomsenom, potpredsjednikom SB za ECA regiju Cyrilom Mullerom, izvršnim direktorom u MMF-u Anthonyem de Lannoyem i izvršnim direktorom u SB Frankom Heemskerkom. Na ovim sastancima razgovarano je o ekonomskim kretanjima, monetarnoj politici, bankarskom i finansijskom sektoru te o aktuelnostima u vezi s programom Bosne i Hercegovine s MMF-om.

Na poziv guvernera Banke Indonezije, guverner Softić je prisustvovao konferenciji na visokom nivou organizovanoj u cilju podsticanja rasprave o temi podrške investicionim aktivnostima vezano za održavanje ekonomskog razvoja, kao i redovnoj prezentaciji stanja regionalne ekonomije, tokom koje su visoki zvaničnici centralnih banaka i međunarodnih finansijskih institucija razgovarali o ekonomskim indikatorima.

## VISOKA DELEGACIJA USAID U POSJETI CBBiH

Guverner Centralne banke Bosne i Hercegovine (CBBiH) dr. Senad Softić primio je 5. 10. 2018. godine visoku delegaciju USAID-a (United States Agency for International Development).

Delegaciju USAID-a činili su Gretchen Birkle, zamjenica pomoćnika administratora Ureda USAID za Evropu i Evroaziju, Andrew Bogel, direktor Ureda za ekonomski razvoj pri misiji USAID u BiH, Amira Vejzagić-Ramhorst, zamjenica direktora Ureda za ekonomski razvoj pri misiji USAID-a u BiH, David King, vođa projekta USAID FINRA (Financial Sector Reform Activity) te Marko Škreb, tehnički direktor USAID FINRA.



Na sastanku su razmijenjene informacije o dosadašnjim projektima koje je CBBiH implementirala uz pomoć USAID, kao i trenutnim i planiranim aktivnostima.

Guverner je iskoristio posjetu delegacije USAID kao priliku da se zahvali na velikoj pomoći koju je ova organizacija do sada obezbijedila u procesu reformi finansijskog sektora u Bosni i Hercegovini. Tom prilikom je spomenuo brojne projekte koji su već uspješno provedeni i završeni, kao i projekat koji je u toku – USAID FINRA, program usmjeren na jačanje i stabilnost finansijskog sektora u BiH te njegovo usklađivanje sa standardima EU.

„Kroz projekte koje je finansirao, USAID je dao ključan doprinos efikasnoj i brznoj reformi finansijskog sektora u BiH. CBBiH je imala podršku u reformi platnog prometa, a koja se smatra jednom od najuspješnijih reformi u Bosni i Hercegovine, kao

i pri uspostavi Centralnog registra kredita fizičkih i pravnih lica i kod drugih projekata, a što je omogućilo CBBiH kvalitetniji rad. Kontinuitet saradnje s USAID-om je nastavljen i putem projekta FINRA“, rekao je guverner Softić.

Čestitajući 20. godišnjicu konvertibilne marke, gđa Gretchen Brikle je istakla da američka Vlada cijeni stabilnost i rad CBBiH, posebno zbog toga što je vitalni finansijski sektor, s brzim pristupom finansijama, bitan i za kompanije i za klijente.

“Više od dvije decenije USAID saraduje s CBBiH kako bi u partnerstvu izgradili ključne poluge finansijskog sektora, uključujući Centralni registar kredita fizičkih i pravnih lica. Međutim, još uvijek postoji prostor za poboljšanje i USAID će nastaviti pružati podršku CBBiH u ispunjavanju tih obaveza“, naglasila je gđa Brikle.

## SLUŽBENICI CBBiH UČESTVOVALI U B2B UTRCI

Službenici Centralne banke Bosne i Hercegovine (CBBiH) učestvovali su u B2B utrci, koja je održana 27. 9. 2018. godine u Sarajevu, na Vilsonovom šetalištu.

Ekipu CBBiH sačinjavala su 43 službenika, a ostvareni su izuzetno dobri rezultati. Naime, ekipa CBBiH je ovom prilikom osvojila nagradu za NAJ FIT ekipu utrke, a ženska ekipa je u ukupnom poretku osvojila odlično 3. mjesto.



## AKCIJA DARIVANJA KRVI

Ove godine, 4. 10. 2018. godine, u Centralnom uredu Centralne banke Bosne i Hercegovine (CU CBBiH) organizovano je dobrovoljno darivanje krvi, u saradnji sa Zavodom za transfuzijsku medicinu FBiH. Svim darivaocima krvi je bila određena krvna grupa i rh faktor, nivo hemoglobina u krvi te su obavljena testiranja krvi na transmisione bolesti.

Inače, CBBiH i dalje ruši svoje rekorde kada je dobrovoljno darivanje krvi u pitanju. Ove godine bila su prijavljena čak 33 službenika, od kojih je 23 službenika darovalo krv, odnosno bili su potpuno fizički zdravi za darivanje.

Ovim putem želimo zahvaliti našim službenicima, sa željom da nas sljedeće godine bude još više.





